

**Perkasa redakan kritikan, mahu Najib diberi ruang dan masa
Malaysian Insider
Aug 31 , 2013
OLEH MD IZWAN**

Pertubuhan Pribumi Perkasa Kebangsaan (Perkasa) meredakan kritikan mereka serta menyatakan pendirian supaya Datuk Seri Najib Razak diberi ruang dan masa untuk membuktikan kepimpinannya.

Baru-baru ini, Ketua Wira Perkasa Irwan Fahmi Ideris membuat kejutan dengan kenyataan kontroversi mendesak perdana menteri meletak jawatan, yang kemudiannya menerima kritikan hebat daripada pemimpin Umno yang mengatakan Perkasa tidak berhak untuk mengeluarkan kenyataan demikian.

"Kita perlu memberi ruang dan masa untuk melihat kerajaan dibawah kepimpinan Najib menunaikannya," kata Timbalan Presidennya, Datuk Abdul Rahman Abu Bakar yang dipetik dari Utusan Malaysia hari ini.

Abdul Rahman sebelum ini juga dilaporkan akan memanggil Irwan dalam masa terdekat bagi mendapatkan penjelasan berhubung kenyataan mengecam Najib tersebut.

Irwan dalam tulisan di blognya bertajuk "Sudah Cukup Segalanya Digadai, Hj Najib Wajar Meletakkan Jawatan" secara terang-terangan mengecam Najib kerana corak pentadbirannya yang dilihat terlalu memberi muka terutamanya kepada masyarakat Cina khususnya pada pilihan raya umum ke-13 yang lalu.

Irwan berkata, masyarakat Melayu memilih Barisan Nasional (BN) bersama dengan bantuan masyarakat India, namun Najib tetap gagal membela dua kumpulan ini sedangkan pengundi Cina yang menyokong BN adalah bilangan yang cukup kecil.

"Kita juga melihat Najib gagal menjaga orang yang undi dia. Melayu yang beri kuasa untuk dia memerintah dengan bantuan orang India, orang Cina hanya lapan peratus sahaja," katanya kepada The Malaysian Insider.

"Kita sudah beri masa, bukan kita terus mendesak (Najib letak jawatan)," katanya lagi, menegaskan itu adalah pendirian Wira Perkasa dan langkah terakhir yang dilakukan mereka.

"Ini pendirian Wira Perkasa. Saya tidak tahu pendirian kepimpinan Pusat Perkasa. Ini yang maksimum kita boleh buat. Kita pun ada sedikit sumbangan untuk BN dalam PRU lepas," katanya kepada The Malaysian Insider baru-baru ini.

Beliau juga menegaskan Perkasa menuntut Najib segera berubah dan mengutamakan kumpulan pengundi Melayu yang memilih untuk mengekalkan kerajaan. Namun Najib masih berpeluk tubuh tanpa sebarang tindakan.

"Najib masih lagi tidak berubah. Kita sudah beri masa, tapi sekarang keadaan semakin serius. Kes jenayah, isu kalimah Allah, semua ini berlaku apabila ketika pilihan raya itu banyak sangat perkara dilakukan, seperti pemansuhan ISA dan banyak lagi," katanya merujuk tindakan kerajaan Najib memansuhkan Akta Keselamatan Dalam Negeri dan juga Akta Ordinan Darurat sebelum PRU13.

"Perkara terbaik dia buat adalah letak jawatan kerana keadaan semakin teruk, tidak bertambah baik," katanya.

Kenyataan Irwan bagaimanapun tidak begitu mengejutkan kerana Presiden Perkasa, Datuk Ibrahim Ali sangat kritikal kepada strategi pilihan raya Najib, mengatakan baru-baru ini kumpulan itu tidak berpihak kepada mana-mana parti politik selepas pilihan raya 2013.

Ibrahim sudah menyatakan pendirian ini kepada penaung Perkasa, Tun Dr Mahathir Mohamad dalam satu pertemuan bersama bekas perdana menteri itu, di mana Najib menerima kritikan ekoran kelemahan prestasi Barisan Nasional dalam pilihan raya 5 Mei. - 31 Ogos 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/perkasa-redakan-kritikan-mahu-najib-diberi-ruang-dan-masa>